



## COMUNICADU PRO MONTE

Lunis 21 de su mese de Martzu est partidu su progetu de Isportellu de Limba “Su Monte Acutu in Limba”, a in ue partètzipat su Comune de Monte comente agregadu in una unione subracomunale chi bidet su Comune de Belchidda comente cabufila, in ue bi sunt fintzas sos comunes de Alà, Uddusò, Òschiri e Padru. S'ativatzione de sos isportellos, finantziados dae sa Lege 482/99 e dae sa Lege Regionale 22/2018, at sa funtzione de favorire e de promovere su bilinguismu in sas zonas in ue sunt presentes sas limbas de minoria.

S'isportellu de Limba, at comente obietivu cussu de faghene intrare sa Limba Sarda a intro de s'amministratzione pùblica, dende a custa sa matessi importàntzia de cussa italiana, ispostende-la dae su ruolu de limba de s'ammentu, de su tempus passadu e de sos raportos informales.

Su progetu est gestidu dae s'Istitutu Chircas de Uddusò e in su comune de Monte at cumintzadu sas atividades sa die mèrcuris 30 de su mese de Martzu e at èssere ativu su mèrcuris dae sas 09.00 a sas 13.00 in su Comune de Monte, cun sa presèntzia de s'Operadore cualificadu, Dutore Salvatore Canu, cun diversas funtziones, chi andant dae sa tradutzione in sardu de sos atos amministrativos e cussa de

dare agiudu a sos tzitadinos chi chere faeddare in sardu cun s'amministratzione.

S'operadore at a chircare fintzas sa collaboratzione de sos assòtzios locales e de sas iscolasas, difatis sunt istados giai leados sos primos cuntatos pro unu laboratòriu chi at a interessare sos piseddos de sas iscolas primàrias e secundàrias de Monte.

S'operadore su mèrcuris est a dispositzione de su pùblicu pro faeddare e dare agiudos subra de argumentos relativos a sa limba sarda, ma podet èssere chircadu fintzas a s'indirizzu mail [monteacutuinlimba@gmail.com](mailto:monteacutuinlimba@gmail.com) o in sa pàgina facebook dedicata *Su Monte Acutu in Limba*.